

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 67 (1982)

Heft: 18

Artikel: Cronica : entschatta october 1981 entochen la fin da mars 1982

Autor: Berther, Norbert

DOI: <https://doi.org/10.5169/seals-881498>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>

Cronica

(Entschatta october 1981 entochen la fin da mars 1982)

Fatgs romontschs

Radunanza da delegai dalla Romania

Ils 8 da november salva la Romania sia radunanza da delegai a Lumbrein. Davart las acziuns menziunadas el rapport annual dil parsura, dr. Giusep Capaul, eis ei già vegni fatg menziun en questa cronica. Il quen munta a 46 446.65 francs entradas e 45 054.– francs expensas. La gronda part dallas expensas fa l'edizion dil Tschespet e digl Ischi semestril ora.

En plazza dad Ignazi Beer elegia la radunanza dr. Toni Berther sco niev delegau romanian dalla Ligia Romontscha e dr. Valentin Vincenz sco suppleant da quei gremi. Per il conredactur permiert, Paul Decurtins, elegia la radunanza buca in successur, damai ch'ins ei alla tscherca d'in niev concept per ils organs ufficials. La radunanza refiera cun 37 encounter 0 vuschs la proposta dalla suprastonza da pretender 2 commembers dalla Romania en la suprastonza dalla Ligia Romontscha e da schar cursar il presidi en turnus tier tuttas quater uniuns cun tgira da territori. Ils delegai acceptan denton la proposta dalla Ligia Romontscha, tenor la qual mintga societad cun tgira da territori dueigi esser representada en la suprastonza dalla Ligia Romontscha, il parsura ed il secretari dueigien denton vegni tscharni en libra concurrenza risguardond en emprema lingia lur habilitads e buca l'appartenenza ad ina uniun. Damai che las statutas dalla Romania corrispondan buca diltut alla realitat survegn la suprastonza l'incarica dad elaborar in sboz per la proxima radunanza. (Rapport annual dalla Romania mira Gasetta Romontscha dils 24 da november 1981.)

Sentupadas dalla Romania da giuventetgna

Medemamein ils 8 da november (avonmiezdi) serimna la Romania da giuventetgna a Vella ad ina sentupada, dalla qual 30 giuvnas e giuvens fan part sut il presidi da Gian Bundi, student dalla medischina. Els decidan dad elaborar novas statutas. Silsuenter plaida il president dalla Romania, dr. Giusep Capaul, davart la Romania da giuventetgna dad ier, oz e da damaun. Allura suonda il referat da dr. Sep Mudest Maissen sur dil tema: La muntada dalla Romania studentica e sia relaziun e differenza cun la Romania gronda. Sur dil medem tema referescha il student Leo Tuor, denton da sia optica anora. Dalla discussiun che suonda fa era cusseglier guvernativ dr. Donat Cadruvi part.

Ils 14 da mars seraduna la Romania da giuventetgna danovamein e quei a Trun per sediscuorer sur dalla lavur prestada e specialmein davart ils plans d'activitad prevedi.

La Romania e la Renania s'entaupan danovamein

Ils 16 da december s'entaupan las suprastonzas dalla Romania e Renania danovamein. Ellas decidan da realisar acziuns da cuminanza sco per exempla la honora-ziun dad ulteriuras persunas meriteivlas el Curtin d'honur a Trun, l'ediziun d'in-
cudisch da canzuns per ils chors mischedai, la scolaziun da carschi e la renova-
ziun della fatscha da nos vitgs. Plinavon vulan elllas intervegnir tier la Corporaziun
da vischernauncas Surselva per che quella risguardi pli fetg il romontsch.
La damonda d'ina eventuala fusiun dallas duas uniuns vegn schada ad interim dad
ina vart.

Radunanza da delegai dalla Ligia Romontscha

La radunanza da delegai dalla Ligia Romontscha dils 12 da december sefatschen-
ta dil program d'acziun e dil preventiv per 1982. Damai che la damonda da finanzas
ei aunc buca definitiva, presenta la suprastanza treis preventivs: in pessimistic, in
realistic ed in optimistic. La suprastanza vul dar special accent alla acziun
romontscha el territori da tschep ed ella preveda da far preparativas per realisar ils
postulats dalla instanza da Berna.

Sco tema dil di ha la suprastanza elegiu l'avischinaziun. Dr. Alexi Decurtins plaide
davart «Schanza, prighels e pusseivladads dalla avischinaziun». Faust Signorell
skizzescha a basa da numerus exempels co la situaziun ei en realitat menziunond
che las differenzas seigien savens minimas e fa propostas concretas co avischiniar
ils idioms. Il president della Ligia Romontscha, Romedi Arquint, dat in maletg
davart la situaziun sco quei ch'ella sepresenta en la veta da mintgadi. Ei seigi
necessari da buca esser memia pigns, cunzun cura ch'ei setracti da translatar
inscripziuns che vegnan giavischadas il bia mo en ina versiun.

Cuors da romontsch per emploiai cantunals

Igl atun fan varga 40 emploiaidas ed emploiai cantunals dalla Surselva part dad in
cuors da romontsch a Cuera. El ei vegnius organisaus dalla Ligia Romontscha sin
iniziativa da siu secretari, dr. Bernard Cathomas, e realisaus dad Ignazi Cathomen,
translatader cantunal. La Regenza ha dau la lubientscha da frequentar quella
instrucziun romontscha, che ha cuzzau 10 seras, el temps da lavur.

Jamna dil cudsich romontsch

Naven dils 14 entochen ils 20 da november arranscha la Ligia Romontscha egl
atrium dalla casa communala da Cuera ina jamna dil cudsich romontsch. Ella
presenta la purschida da cudsichs romontschs ad in vast publicum, fa encon-
scent ils scribents romontschs, presenta las casas edituras romontschas e vul
intensivar la vendita da scartiras romontschas.

Nova scartira da neologissem

Ils 30 d'october presenta la Ligia Romontscha en ina conferenza da pressa ina scartira cun novs plaids. Igl emprem carnet d'ina retscha cuntegn ver 1000 expressiuns romontschas ord igl intschess dil sport e las illustraziuns corrispondentas. Risguardai ein 3 idioms, per il sutsilvan existan feigs separai aschuntai. Ils plaids dils differents idioms ein ordinai en in bloc e buca separai en colonnas sco tier las gliestas da neologissem. Per derasar e far enconuschents ils novs plaids ein diversas tablas illustradas vegnidas engrondidas en fuorma da placat ch'ins sa pender allas staziuns da skis, en hallas da gimnastica ed en tuttas scolas romontschas. Responsabla per la nova ediziun ei la cumissiun da neologissem cun dr. Alexi Decurtins alla testa. La gronda laver pratica ha lic. fil. Florentin Lutz prestau. (Cump. GR, 6-11-1981)

Reediziun dalla Crestomazia romontscha

La casa editura Octobus da Cuera reedescha el decuors dils treis proxims onns la Crestomazia romontscha da Casper Decurtins. La cefra minimala da 300 subscriptiuns ei contonschida. Ultra dalla reediziun vul ins era publicar en in tom supplementar igl entir material rimnaus ord la Val Schons e publicaus en differentas Annalas. Plinavon eis ei previu in tom cun register.

Annuari dil Cantun Grischun era en romontsch

Igl Annuari dil cantun Grischun, che cumpara per la 145avla gada, cuntegn il register dallas differentas autoritads cantunalas, circuitalas, communalas e regiunalas. El enumerescha era las autoritads federalas e las organisaziuns ecclesiasticas. Uonn ein ils impurtonts tetels sco era la denominaziun dallas differentas autoritads ed instituziuns vegnidas indicadas per l'emprema gada era per romontsch e talian.

Reglement da survetsch militar per romontsch

Ils 18 da december presenta il cau d'instrucziun dall'armada svizra, Hans Wildbolz, il reglement da survetsch militar en versiun romontscha. Quella scartira ei edida en 16 000 exemplars, 9000 en versiun sursilvana e 7000 en versiun ladina. Dr. Gion Deplazes ha translatau il reglement en sursilvan cun agid da colonel Rudolf Cajochen e capitani Rinaldo Gadola.

Prelecziuns da scribents romontschs

Ils 13 d'october prelegia Ludovic Hendry a Lags. Igl emprem rauenta el or da sia veta e suenter dat el in schatg ord differents cudischs, aschia ch'igl auditur sa perseguitar il svilup dil scribent tuatschin. Il di suenter sepresenta Ludovic Hendry ad entginas scolas da Lags.

L'acziun 70 da *Domat* organisescha mintg'onn ina sera romontscha d'auturs el center «Formaziun e sentupada». Ils 20 da november prelegian *Annamengia Bertogg* ed *Imelda Coray* schatgs ord lur ovras.

Informaziun davart il romontsch a Le Sentier

Ils 3 da november serenda ina delegaziun digl «Institut de studis romontschs Rumein» cun pader dr. Flurin Maissen alla testa a Le Sentier dend suatienscha alla invitaziun dil «Centre d'Education Ouvrier Le Sentier». Gion Giachen Furer dat ina survesta sur dil romontsch e da sia periclitaziun. El center dalla sentupada stat denton la musica. Armin Caduff e Christoffel Nay contan differentas canzuns romontschas accumpagnadas al clavazin dad Annamaria Schlosser.

Il romontsch el radio svizzer

Dils 7 entochen ils 14 da mars s'occupescha il Radio dalla Svizra tudestga e retoromontscha en numerusas emissiuns dil romontsch e da sia cultura. Denter auter vegn era emess ina serada romontscha a Trun, dalla quala differents chorus e gruppas da musica ord igl entir intschess romontsch fan part.

Dapli romontsch al radio ed alla televisiun

Sin fundament d'ina instanza propona il Post da programs da radio e televisiun a Cuera in slargiament dil program romontsch. Aschia giavischia el 4 uras radio per di. Pli tard duei quei program vegnir slargiaus ad in miezdi. – L'emissiun da televisiun «Svizra romontscha» duei vegnir emessa mintga duas jamnas enstagl da mo ina gada il meins sco tochen dacheu. Il «Telesguard» ei d'amplificar da 10 sin 15 minutus. Cul temps giavischian ins era tier la televisiun ina presenza quotidiana.

Cultura

75 onns Societad da musica Lumbrein

Uonn festivescha la Societad da musica Lumbrein siu 75avel onn d'existenza. A caschun d'ina sera famigliara dils 30 da schaner vegn quei giubileum commemo-raus. Ils commembers che fan part dalla musica 25 onns e varga obtegnan ina regurdientscha.

Exposiziun da Paul Siat

Ils 20 da november ha liug ella casa cumin da Glion l'avertura dalla exposiziun dils maletgs da Paul Siat. Igl artist – sia vera schlattelina senumna Speissegger – ei

carschius si a Budapest nua che siu bab, oriunds da Schaffusa, era emigraus. Cun 20 onns vegn Paul Siat en Svizra. Dapi ver 10 onns eis el secasaus a Siat. Sia occupaziun principala ei il dessignar. Ses maletgs da tempa tradiziunala ein per gronda part l'expressiun dalla attaschadada alla nova patria grischuna.

25 onns Chor mischedau Turitg

Ils 25 da november dat il Chor mischedau dalla Uniun grischuna da Turitg in concert a caschun da siu giubileum da 25 onns. El ha vuliu honorar specialmein Duri Sialm e conta perquei duas da sias cantatas: «Allas steilas» e «La lavina».

Societät per casalii un Suisse

Sport

Campiunadi da velocross grischun a Falera

A Falera ha liug ils 25 d'october igl emprem campiunadi grischun da velocross. Victur daventa Christian Vinzens.

Campiunadi grischun nordic a Mustér

Ils 9 e 10 da schaner organisescha il Club da skis da Mustér il 59avel campiunadi grischun nordic. Campiun grischun daventa Franz Renggli. Tier las femnas gudogna Evi Kratzer da S. Murezi e tier ils giuvens Hans Luzi Kindschi da Tavau.

Conradin Cathomen daventa vicecampiun mundial

A caschun dil campiunadi mundial da skis a Schladming (Austria) gudogna Conradin Cathomen da Lags la medaglia d'argien en la cuorsa rapida. El ei vegnius selecziunaus per sco il davos dils quater Svizzers che han il dretg da far part da quella cuorsa.

Fatgs socials

Avertura della Casa da vegls e da tgira a Glion

Ils 12 da december vegn la Casa da vegls e da tgira a Glion inaugurada. Ella porscha suttetg a 56 cussadents per tgira speciala ed a 35 personas saunas. Il niev casament sortescha digl anteriur «Asil evangelic sursilvan» baghegiaus 1929. Il niev project deriva dils architects Johannes Häusler e Luregn Cathomen.

Survetsch da famiglias e vegls en Lumnezia

Ils 3 da mars seconstituescha a Vella l'uniun «Survetsch da famiglias e vegls Lumnezia». Siu intent ei da porscher agid ella tgira da vegls e malsauns e da gidar a surmuntar situaziuns precaras en famiglia. Ils survetschs concrets cumpeglan lavurs el tenercasa, tgira e transport da malsauns ed invalids, agid da famiglias. Emprema presidenta da quella instituziun sociala ei Cristgina Caminada da Surin.

Scola

Scolaziun per carschi en Surselva

El decuors dil schaner entochen il mars realiseschan la Romania e la Renania sut l'egida da Maria Cadruvi cuors da scolaziun en differents loghens dalla Surselva. Ils responsabels han eligiu temas d'interess general e sco loghens da scuntrada era vitgs pli pigns. Il polizist cantunal Rest Arpagaus orientescha davart il traffic a Trin, Trun e Mustér. Toni Halter relata davart ina «sentupada cun las praulas» e Bernard Cathomas interpretescha enzacontas praulas ensem cun ils participants. Loghens: Sagogn e Danis. Il scribeint Silvio Camenisch e la scribeinta Anna Mengia Bertogg prelegian da lur ovras a Luven ed a Sedrun. Davart las jarvas curativas plaida Rita Cadruvi a Vuorz ed a Vella. Ils scolasts Giusep Decurtins e Giachen Degonda arranschan duas seras da cant a Rueun ed a Flond.

Niev cussegliader da clamada per la Surselva

Ils 4 da november elegia la cumissiun per igl entruidament da clamada dil secund district Alexi Pfister da Schlans sco niev cussegliader da clamada per la Surselva ed il district Plaun (senza las vischnauncas da Favugn e Tumein). El succeda a Victor Durschei che vegn pensiunaus la fin da zercladur 1982.

Nova redacziun per la periodica «Radioscola»

Suenter ver redigi 27 onns la periodica «Radioscola» abdichescha dr. Alfons Maissen. En siu stagl supren ina redacziun da quater dèls quella incumbensa, numnadamein Cristian Joos, coordinatur responsabel, Richard Cavigelli, Rico Falett e Mario Jegher. Els han dau agl organ in vestgiu niev. Era la fuorma dil cuntegn ei vegnida midada: Igl organ duei survir sco carnet da lavur en emprema lingia per il scolast ed en secunda lingia per diever dil scolar.

Romontsch allas universitads svizras

Naven digl atun 1981 augmenta l'universitat da Friburg la purschida da romontsch

da 2 sin 4 lecziuns ad jamna. Sper dr. Alexi Decurtins, ch'ei leu docent dapi 1957, surpren dr. Valentin Vincenz il surpli da lecziuns.

L'entschatta schaner giavischia la Regenza grischuna en ina brev al cussegl da scola svizzer ch'ei vegni creau ina professura per romontsch al *Politecnicum federal a Turitg*. In meins suenter rispunda il cussegl da scola ch'il postulat dalla Regenza seigi pil mument aunc buca realisabels. Ei seigi da sclarir, schebein plirs pertaders per quella professura vegnissen en damonda e schebein il planisau Institut retic savessi gidar a mantener la professura.

Ils 8 da mars supplicescha il deputau Leo Lorenzo Fosco en in postulat la regenza turitgesa dad interpretender las mesiras necessarias per realisar alla *universitat da Turitg* ina professura per il lungatg romontsch.

Politica

Dumeni Columberg obtegn buca igl absolut pli

A caschun dallas elecziuns communalas da Mustér digl emprem da november contonscha dr. Dumeni Columberg per 20 vuschs buca igl absolut pli da 547 vuschs sco president da vischnaunca. Ina controversa en connex cun la surbaghegiada dil «Disentiserhof» e pertucccont in sulom e dus inserats en la *Gasetta Romontscha* han effectuau quei resultat (cump. GR, 23, 30-10, 3, 13-11-1981). El secund scrutini dils 15 da november vegn dr. Columberg reelegius cun 622 da 912 vuschs.

Sentupada culturala dalla Partida cristianodemocratica dalla Cadi

Sut la bitgetta dad Alexi Salm, Mustér, organisescha la Partida cristianodemocratica dalla Cadi ina sentupada culturala ils 21 da november. En la claustra da Mustér presenta pader dr. Daniel Schönbächler la revista sonora davart la veta dils paders e fraters e davart la scola. Pader dr. Bernard Bürke empeila ils participonts als loghens d'excavaziuns dalla claustra. Leu declara el la vasta interpresa archeologica. Silsuerter serenda l'entira societad el hotel «La Cucagna». Il secretari dil departament da giustia, lic. iur. Gion Claudio Candinas, referescha davart las damondas d'archeologia dil pugn da vesta dalla lescha cantunala dil Grischun anora. Ei suonda il votum da lic. fil. Cristian Collenberg davart l'identificaziun cun las partidas politicas.

Informaziun davart la Svizra

Ils 29 da december organisescha l'Uniun da cura e traffic da Mustér e la Partida cristianodemocratica dalla Cadi ina sentupada d'informaziun e discussiun. Il referent dalla sera ei prof. dr. Thomas Fleiner da Friburg. El plaida davart las structuras politicas ed economicas della Svizra sin fundament d'ina revista sonora. Silsuerter suonda ina discussiun sut l'egida d'Alexi Salm.

Fiers la nova lescha da scola

Ils 7 da mars fieran ils votants grischuns la nova lescha da scola cun 14 889 nas encunter 12 685 gies. Ils resultats dalla Surselva secloman:

	na	gie
Cadi	990	1840
Glion	600	597
Lumnezia	456	869
Rueun	216	440
Stussavgia	22	216
Trin	444	468

Suizazun per carochi en Surselva

Reelecziun dils cussegliers dils stans

Ils 7 da mars vegnan ils dus cussegliers dils stans, dr. Luregn Mattias Cavelti e dr. Ulrich Gradient confirmai en lur uffeci cun suandonts resultats:

	Cavelti	Gradient
Cadi	2 456	1 856
Glion	1 003	846
Lumnezia	1 253	905
Rueun	563	403
Stussavgia	125	165
Trin	484	596
Grischun	17 233	18 100

Cumissiun dil cussegli naziunal cun cusseglier federal dr. Kurt Furgler en Surselva

Igl emprem da fevrer viseta la cumissiun dalla «Lex Furgler» la Surselva. Ella ha da s'occupar dalla reglamentaziun dalla vendita da schischiom a persunas digl exteriur. Il present uorden scada cun la fin da 1982. Per ver envesta en la situaziun concreta viseten ils politichers differents vitgs sursilvans sco Falera, Lags, Degen e Glion. Era cusseglier federal dr. Kurt Furgler ei presents.

Economia

Nova halla polivalenta per Vignogn

Ils 8 da november inaugurescha Vignogn sia nova halla polivalenta projectada d'architect Otto Oeschger, Cuera. Ella cumpeglia la halla da gimnastica che sa era vegnir duvrada sco sala communal, differentas localitads per las scolas, las uniuns ed ils pompiers sco era ils stabiliments per la protecziun civila cumbinai cun localitads per il militer.

Tunnel per la Val Sumvitg

Ils 17 da schaner decidan ils vischins dalla vischnaunca da Sumvitg cun 709 encounter 130 vuschs da construir in tunnel per il transit en la Val Sumvitg interruts entras la bova dils Barschaus digl emprem d'uost 1980. Ils cuosts prevedi muntan a 7,5 milliuns francs.

Hotel Baur a Mustér en difficultads

Il Hotel Baur a Mustér, aviarts il december 1980, ha gia difficultads finanzialas. Las raschuns da quella situaziun ein il grond surpassament dils cuosts da bagheggiar ed il grond diember da persunal. Per igl unviern 1981/82 surprendan las Pendicularas Mustér il hotel da tschun steilas.

Avertura dil niev center da vacanzas «Disentiserhof» a Mustér

Ils 11 da november vegn il niev center da vacanzas «Disentiserhof» a Mustér aviarts. Ei setracta dalla emprema etappa che cumpeglia ils dus restaurants «Alpetta» e «Caschlé», la bar «Placi» cun dancing, igl irla da heighels ed 85 appartaments en possess privat. Igli entir stabiliment vegn a cumpigliar treis baghetgs cun 153 appartements e 450 letgs.

Prolungaziun dalla concessiun d'auas en Lumnezia

La vischnaunca da Lumbrein decida ils 29 da november da buca prolunghir la concessiun d'aua cun la NOK. Ella fa valer ch'ils flums vegnessien schigentai entras quei project e ch'ei detti interessents dalla Surselva per l'utilisaziun della aua, senza denton donnegiar pli fetg igl ambient.

La vischnaunca da Cumbel prolunghescha denton la concessiun, quei denton mo per 5 onns.

Niev prospect regiunal per Breil-Vuorz-Andiast

Per l'entschatta dalla sesiun d'unviern 1981/82 edeschian las uniuns da traffic da Breil, Vuorz ed Andiast in prospect communabel. Quel presenta ils treis vitgs che han fatg atras ils davos onns in grond svilup turistic. In grond meret leutier han ils runals e las pendicularas Péz d'Artgas SA. Quella interpresa sa inaugurar l'entschatta dalla sesiun 1981/82 il restaurant Burleun ch'ei vegnius restauraus.

Dieta dils survigiladers da serenera a Sagogn

Ils 12 da november serimnan ver 50 survigiladers da sereneras a lur dieta annuala a Sagogn. Il parsura dalla radunanza, inschignier Gieri Deplazes, menader dalla partiziun cantunala per auas piarsas, menziunescha ch'il Grischun hagi entochen

ussa 15 sereneras. Enzacontas vegnien baghegiadas 1982, sco p.ex. quella da Tujetsch. Sco cusseglier guvernativ, dr. Donat Cadruvi, di en siu plaid, seigi la laver dils survigiladers ina impurtonta contribuziun per il schurmetg dil ambient.

Decisiun dalla Dertgira federala pertucont Glion 1 e 2

La Dertgira federala renviescha ils recuors da dr. Pius Schmid, Glion, e Gallus Cadonau, Vuorz, fagend valer che las concessiuns dadas a sias uras seigien valeivlas. Plinavon entra la dertgira buca en il recuors da Cristian Caduff da Danis che sappi buca contestar ils conclus da vischerna da 1962 e 1963, damai ch'el havevi aunc buca il dretg da votar da gliez temps.

Protezion duis ouvriures

Manzegna stampada,

verdad scumpada.

Tgi che ha nuot da dir plaida da structuras.

Las pli bialas uras ein quellas che s'entardan.

L'ustria ei savens il pistregn dallas columnias.

Calei da secattinar,

fagei uiara!

Sche ti vul esser persuls,

va denter la glieud!

Ils cumpliments ein l'avanguardia digl assassinadi.

Buca arva la finiastra,

tia dunna savess pigliar malcostas!

La rihezia dils ins

crescha sillla tuppudad dils auters.

Pertgei rumpa il ruog e buca la fontauna?

Mal il venter ei meglier che nuot.

HSp